



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir_yimyim

tir yimyim TAPAK 8

**Pakistan nung airbase ti amakba
ajanga rara anen: Jaishankar**

**Nicholas Pooran international
asaya nungi anisungzüker**



VOL. XXII ISSUE NO. 237 (ADOK 237) DIMAPUR RASEMNÜ (WEDNESDAY) AAMI (JUNE) 11, 2025 ₹ 5.00

Ceasefire ground rules yanglushitsüla



Dimapur, June 10, 2025 (TYO): Naga yimjung olemtep atema interlocutor-i ceasefire ground rules akangkanga benshitsü aser metokmeperitem reprangshitsü atema National Highway Area Village Council's Forum-i ayongzükogo.

May 23 nü Unity village nung NSCN (Khango) züngsem 30 shi kati nija ki kati atuba aser tanga telok ka nungi tanishir ka tepsettsü merangba telok balalai aitsür.

Iba anogo injang mashii khatokba ajanga yimdaklirtem kanga tsübudaktsü aser aoksatepa liasü.

India sorkar aser Naga political groups tsüngda ceasefire alitsü sign sütepba sülen parnok o parnok tsüngda raraba anenogo. Ajsüüaka Nagaland nung alirtem aitsü nung timtemer ta Forum Convenor Sebastian Zumvu-i ashi.

National Highway Area Village Council's Forum ya NH-29 anasa aliba yimtsüng 13-i tentetba telok ka lir aser Mongulbarnü Sovima Council Hall nung osangbener senden ka ayongzüka agi.

Ceasefire ground rules nung metokmeperi aika lir kechiyong ceasefire agreement nung state sorkar maden. Civilian temi law & order khuret ta ashibaji telungpurtemi Naga yimten tebilemtsü ta züngshir ta Sebastian Zumvu-i ashi.

Law & order khuret ya state sorkar meyong lir aser sorkari iba tensa azüoktsü koka lir saka Naga yimten tebilemtsü ta aibelen züngshiba ajanga sorkari tebang meiteter. Iba amai dangbo inyaka maotsüla anungji India sorkari ceasefire ground rules yanglushitsüla ta Forum-isa metetdaktüsü.

Naga public-i telungpurtemi inyangsangshi agi laktetogo.

Parnoki Naga nunger atema rarar ta shia kechiba Naga nunger reshikangshir? Tanü Naga loktiliba jenjangji iba nung lir ta parnokisa ashi.

Onok asoshi rarar ta ashirtemi onok timtemdaktüsü. India nung sensotem ama onoki linür aser tarutsü putu nem iba Naga yimten tebilemtsü magütsünür. Iba putu nungsa Naga yimten latetdaktüsü ta Forum-isa ashi.

Telungpurtemi uniform nung prangpong bener senzüba aser tashiyim agi sen saruba, nisung pur aoba anentsü atema Ceasefire ground rules ya akangkanga benshitsüla ta Forum-i Interlocutor dangi shidi züluba nung shia lir.

Telungpurtem indang Ceasefire Monitoring offices ya shibangtsüla kechiyong item tesem nung ozüng alema inyakertem jenoker. Telungpur ajak pei pei designated camps nung lidaktsütsüla. Talisa security forces-i Ceasefire Monitoring offices mesüra designated camps telungi ia ozüng alema inyakertem aputsü tashi agütsütsüla aser iba atemaji ceasefire ground rules meyipa reprangtsüla ta Forum-isa ashi.

May 23 tatalokba nung shilem agirtem pur ozüng tapet agi merenshitsüla. Nagaland nung alirtem timi lia aotsü atema telemtetba tajung ka agitsüla ta Forum-isa takhangba agütsü.

Iba onük atema National Highway Area Village Council's Forum-i June 11 nü parnok telongtet nung ghonda 6 dokantem shibanger lungkak aittsü ayongzükogo.

May 23 nü ozüng alema mapa inyakar pua marutetba atema tejashi sayua parnok anepdang 6:00 ako nungi anüngdang 12:00 tashi dokantem shibanger lungkak aittsü.

Modi'er sorkar küm 11 tsüngda aika inyaktetogo: BJP Nagaland

Kohima, June 10, 2025 (TYO): Prime Minister Narendra Modi-i aniba BJP sorkari küm 11 tashi temelenshi nung anir aruogo aser linük dang masü saka meta talang pilar aliba Nagaland state tem ama melenshidaktsüogo ta BJP Nagaland-i metetdaktüsü.

NDA sorkar küm 11 abensaba tenüng nung BJP Headquarters nung BJP Nagaland unit lennirtemi osangbener den senden ka amen.

"Seva, Sushasan aur Gareeb Kalyan" omen ajanga sensotem dang PM Modi lenisüba kübok India renlokba osang sangdongtsü nükjidong lir ta Deputy Chief Minister & BJP Legislature Party Leader Yanthung Patton-i ashi.

"Tesüba küm 11 tsüngda India nung technology, infrastructure, aser economy renlokogo. Asenok alima nung 11th largest economy aliba 4th largest economy kümogo" ta pai ashi.

COVID-19 wara mapang alima timtem saka India maneni ain aser iba ya Modi lenisüba ajanga liasü ta Patton-i ashi.

"India putiotsü nung Modi putu ya "golden chapter" ka lir aser sorkari terenlok aser tebilemtsü bena ketdangsüba atema tenügsang agütsür. 2014 matongdang nübortemi temelenshi angutsü asü masü ta terata nung liasü saka tanübo Modi lira temelenshi angutsü ta tamang kateter" ta paisa ashi.

Modi'ersorkar ajanganisung 270 million tema sensaktia nungi anitetogo aser iba ya exporter akümbaajanga lir. Ayushman Bharat, PM Awas Yojana, Jal Jeevan Mission, Ujjwala Yojana, aser tanga scheme tem ajanga direct benefit transfers agütsüba ajanga sensakertem tashi itogo ta paisa ashi.

Centre sorkari Arrla 370 agienba, triple talaq noktanga, GST tenzüka aser Ayurveda o Yoga amala India sobaliba alima jenjang nung ajungketba atema tenügsang agütsür ta Patton-isa ashi.

Modi'er sorkari defence aser security tsütsü mapa tajung inyakogo aser Operation Sindhu

amala lemtet ajanga national security akangshiogo ta paisa shisem.

Tourism & Higher Education Minister Temjen Imna Along-ia Mod'er sorkar indang tamendakdak nenshia lemsatet.

Modi'er sorkari Seva (Service), Sushasan (Good Governance), aser Gareeb Kalyan (Welfare of the Poor) nung ajemdaker inyaker aser iba ajanga 2014 nungi India renloka arur. Modi'er lenisüba kübok India ya development, global respect, aser security linük ka kümogo ta Along-i ashi.

Tangya India tasenba lir. Iba putu ya Amrit Kaal lir aser 2047 tashi nung India renloksü ta paisa ashi.

"India ya alima nung top 10 economies nung maden liasü saka tanübo 4th largest economy kümogo. Foreign exchange reserves kanga ajungketogo aser defence exports 34ben agi teimba küma Rs. 23,622 crore jungogo. India-i Tejas aircraft, BrahMos missiles, aser INS Vikrant amala indigenous defence tashitem yangluteta lir" ta Minister Along-isa metetdaktüsü.

Government e-Marketplace (GeM), Direct Benefit Transfer (DBT) amala inakyim ajanga tiyongtsü nung inyangsangshirtem agien aser middle class atema tax relief angu. Ease of Doing Business index nung India jenjang 142 nung aliba 63 buba kümogo ta paisa ashi.

India nung infrastructure kanga renlokogo aser iba nung alima nung highest railway bridge Chenab Bridge aser Vande Bharat trains 136 yangluba densema lir ta Along-isa ashi.

India nung yimtsüng 99% tashi tangbo lenmang ajanga sendaktepogo aser Amrit Bharat Scheme kübok railway stations 103 tajungba küma yanglushiogo ta paisa shisem.

Nagaland nung PM Garib Kalyan Yojana aser PM Awaas Yojana amala scheme ajanga teyari tulu nguogo aser beneficiary tem ajangzükogo ta paisa ashi.

PM Kisan Samman Nidhi kübok aluyimer nem Rs 3.7 lakh crore

agütsüogo aser PM Fasal Bima Yojana kübok insurance claims Rs 1.75 lakh crore agütsüogo. Centre-i Ayushman Bharat, Ujjwala Yojana, aser Jal Jeevan Mission ajanga nübortem nem teyari tulu agütsür ta Along-isa ashi.

Centre sorkari tetsürtem nem tashi agütsür aser legislatures nung 33% reservation, maternity benefits, aser Mudra Yojana o Self Help Groups amala schemes tenzüktüsü. Alima nung tetsür pilot teimtibaji India nung lir aser STEM o armed forces nunga tetsür aikati shilem agir ta Minister Along-isa metetdaktüsü.

NDA sorkari National Education Policy 2020, IITs, IIMs, aser university 490 tashi lapokogo. Skill India initiative ajanga lanur crore 1.6 nem training agütsüogo aser startup ecosystem nung India jenjang tasembuba nung lir ta paisa ashi.

Ayushman Bharat health cards ajanga healthcare infrastructure kanga renlokogo aser Rs 1.3 lakh crore tashi 9 crore treatments süogo aser linük nung health centres teimba kümogo ta Along-isa metetdaktüsü.

Rising Northeast Investors Summit 2025 nung Rs 4.3 lakh crore investments bendenogo. Northeast nung telungpur khuret 64% ajemogo aser Rs 44,859 crore endoka development projects 3,600 inyaktsü agizükogo ta paisa ashi.

NDA sorkari regional connectivity tajungba kümdaktsüogo, greenfield airport yanglur aser South Asia nung cancer care network tuluba yanglur ta paisa shisem.

Modi'er sorkari küm 11 tsüngda 2047 tashi nung Viksit Bharat (Developed India) atema tamendakdak tajung yangertetogo ta Minister Along-isa ashi.

BJP-i district office tem nung exhibition ayonga agitsü aser August 15 tashi mandal ajak nung awareness campaigns agitsü ta BJP Nagaland Secretary aser 11-years celebration Narendra Modi government in Nagaland Convener Shilu Longchar-i ashi.

Nagaland nung COVID-19 atema senden amen

Dimapur, June 10, 2025 (TYO): Directorate of Health & Family Welfare nung COVID-19 preparedness atema tongtipang senen ka menogo.

Health & Family Welfare Minister P. Paiwang Konyak menden ser amenba senden nung Department Commissioner & Secretary, Director & HOD aser tongti ketdangsürtem aden.

Senden nung linük nung COVID-19 tensa asadang aser Nagaland nung health system

renema aliba meyipa reprangshia liasü.

Minister Paiwang-i Health Units ajak nung vigilance, surveillance aser public health measures akangshitsü metetdaktüsü.

Iba senden nung Minister Paiwang-i Manpower, Medicines, Consumables, Oxygen availability Status, Rapid Response Teams, Surveillance status aser overall readiness meyipa reprangshi.

Department of Health & Family Welfare-i anogoshia COVID-19 tensa asadanger aser raratsü renema lir. Linük nung COVID tensa azüka lir anungji nübortem maoksateptsüla aser COVID-19 inakyim sülen anidaktsü metetdaktüsü.

India sorkar Guidelines ama Severe Acute Respiratory Infection Cases aser 5% Influenza Like Illness Cases tendangtsü ta senden nungsa lemtet.

Zubza bridge nung gari tulutem noktanger

Dimapur, June 10, 2025 (TYO): Niuland Deputy Commissioner Sara S Jamir-i Zubza (Atughoki) bridge, Niuland nung gari tulutem mesenzütsü tetuyuba agütsüogo.

Iba atema December 22, 2022 nunga sangdong ka agütsüogo aser iba nung ashiba kasa tenokdangba agütsür ta Sara S Jamir-i ashi.

Zubza (Atughoki) bridge nung

khen nung gari ka dang süidaktsütsü aser 2 axles (6 Wheels) tashi dang senzütsü melar. Anogo nung 2-axle HMTVs 30 tashi dang senzüdaktsütsü ta Niuland DC-i ashi.

Iba apu nung 3 axles (10 wheels) aser tema garitem senzütsü memelar aser aibelenertem dang Rs. 10,000 senchi achiba den gari sota ayutsü ta DC-isa metetdaktüsü.

BharatBenz den külem sür Mahindra-i Mokokchung nung “car mela” akar



Mokokchung Car Mela tenzükba sentong nung Mahindra, Bharat Benz, AMAM, Spearhead ketdangsürtem den shilem agia adenertem külemi tangokba noksa nung angur. Mokokchung, 10th June, 2025

Mokokchung, 10 June (TYO): Gari yangluba Company Bharat Benz den külem sür Apex Motor Enterprise Mahindra & Mahindra teloki June 10th & 11 anogo ana nü atema ‘Car Mela’ sentong ka yangi Imkongmeren Sports Complex, Mokokchung nung ayongzüka kadar.

Iba car mela tenzükba sentong tongmelang ka agidang, Up – Country Manager, Mhabemo-i jembidang, parnok yangi atuba ya ozü company indang gari ajungkettsü (advertise asütsü) kisüing masü saka Mokokchung nüburtem den lungjema aser tesentaktep tali akangshitsü nükjidong nung atuba lir, ta metetdaksü.

Iba ya Mahindra & Mahindar asoshi mezüngbuba “car mela” ka lir, “Mokokchung nung onok indang customer aika lir, aji oda, parnoki iba sentong akatsü ajungshiba den onokia Mokokchung nung iba sentong ayongtsü tejangraba tulu nung atuogo”, ta pai ashi.

Mahindra customer-tem atema osang tajung kaji – tsükdakradang kecha majurura, ita 4-6 tsüngta Mahindra

Showroom & Service Centre yangi Mokokchung nung amenoktsü asoshi tekaraba nung maparen balala inyakdar, ibaji kodang asangsang kümdir, nüburtem mapa inyaktsü maongka anguba den customer-tem lenmang aisü nung tajangzüka angutsü imlar, ta Mhabemo-isa metetdaksü.

Mokokchung nung Mahindra company indang gari amshir aika aliba dang masü saka iba ya tongtibang tesem ka lir, yangi showroom & service centre lapokba ajanga Mokokchung district dang masü kidanger - Zunheboto, Tuensang, Longleng, Shamator, Noklak aser Wokha shilem kar ayimjemtsü imlar, ta paisa shisem.

Iba sentong ayongtettsüsa Adventure and Motorsports Association (AMAM), Spearhead Initiative, Mokokchung district administration, Mokokchung Municipal Council parnoki lenmang balala nung nungita yariba asoshi ajak dang pelaba Up – Country Manager-isa metetdaksü.

Anogo ana mela nungji Mahindra indang gari tasen

adokba – Thar Roxx, Scorpio-N, XUV 700, XUV 3XO aser Bharat Benz 1926-tem test drive sütettsü, iba den na tang tamshidak gari kecha timtem makai melentettsü (exchange bonus), idangjisa SBI aser HDFC bank nungi senotsü atema renemtettsü (spot financing), idangjisa nai aginüba gari meka-a yutettsü aser offer balala maongka agitettsü (spot booking with offers). Jangratemtsü kaji na tamshidak gari yoknüra NEO Motors aser MJ Motors-temi idangjisa gari tejentemji alizüktsü. Iba mela ya 11th June tashi dang alitsü, anungji, tejangrartermbo yakta or iba maongka agitsü junger.

Iba sentong nung Apex Motor Enterprise nungi mongintemi gari tasen adokba balala indang rateta ashi. SBI Main Branch, Mokokchung nungi ketdangsür kadi SBI nungi senotsü teyari balala agiba indang lemsatp. Team AMAM aser Spearhead Initiative nungia ketdangsürtemi mapang tatsütsü agia jembia. Iba sentong nung temoatsü meshia Mokokchung Town Baptist Arogo Pastor, Yanglo-i sarasadem.

Angh tanubutisang Longlam yimdak shimogo

Kohima, Aami/June 10 (TYO): Mon district kübok Longlam yimdak alirtem aser yimtsüng lenir asoshi sentong balaka ayongzüka June 10, 2025 nü iba yimtsüng asoshi Angh tasenba Wangtun Wanmei shima liasü.

Wangtun Wanmei ya arishi küm 25 tain lir aser Longlam puti otsü nung Angh tanubutisang alitsü aser Konyak nung aliba tesem nung Angh tem rongnunga tanubutisang ta ashir.



Wangtun Wanmei

Iba sentong nung Chief Angh of Wangla, Leiwang: Hongphoi Angh, Manto; Lapa Angh, Tinwang; aser Oting Angh, Tahwang nungeria o jembia liasü.

Peiawang Konyak-i tayongzüka o jembia aser Pastor LBC, Phuhlem-i Angh tasenba moaja sarademja liasü.

Iba sentong nung kidanger yimtsüngtem nungi Angh temi anir yimdaklirtem arua aden aser lokti chiyong chiyonga sentong tembang.

Kohima nung 13 Assam Rifles temi fire exercise agitsü

Dimapur, Aami/June 10 (TYO): Deputy Commissioner, Kohima ajanga nüburtem dang sangdong ka nung, 13 Assam Rifles temi Firing Range, Kohima Garrison nung July 1-31, 2025 anogotem small arms firing exercise alitsü, ta metetdaksüogo.

Kohima jila kübok yimtsüng, ward ketdangsür aser

Panchayats tem dang iba mapang Firing Range leni nisung meyoktsü mesüra kiset shiruru, talisa nashi aser sakoli amala rem achitsü anir maotsüla, ta sangdong ajanga ashi.

Nüburtem lendong timtem nungi kumzüka aser jenbua alitsü mechi iba sangdong ya agütsür, ta DC Kohima ajangasa ashi.

Kohima Police-i auer pezü apu



Dimapur, Aami/June 10 (TYO): Tesüiba küm asem tsüngta auyaba ken o balala nung dena alir aser mapang shia ozüing nung aibelener pezü Sechü (Zubza) Police Station nungi Kohima Police temi apu.

Sechü (Zubza) nung alir kati ashishitepa ken o benokba sülen parnok ya June 10, 2025 nü pua liasü.

Ken o benoka aliba nung ashiba agi, 2023 küm nungi parnok yagi yimya balala nung scrap materials, automobile parts, engine components, batteries aser danga jenjang aketba osettem Old KMC dumping site nung aliba business establishment ka nungi ayua aru.

Parnok yagi sen 4 lakh jenjang osettsüset auya ta asadangteta lir. Iba den külemi par pezü ya NHIDCL ajanga tang Zubza nung 4-lane

highway projects nung amshitsü yua aliba yinsang osettema auya ta ashir.

Par pezü ya arishi küm 28 tain Throngso Khiung Yim, PO/PS/Dist: Shamator, Present Address: Lower Bayavü, Kohima; arishi küm 21 tain Thungaolou, PO/PS: Tadubi, District: Senapati, Manipur, Present Address: Kezekie Colony, Kohima; arishi küm 25 tain Khriesietuo Dzuvichü, PO/PS: North PS, District: Kohima, Nagaland, Present Address: DBS, Kohima aser arishi küm 20 tain Ruokuozhao Semou, PO/PS: Chiephobozou, District: Kohima, Nagaland, Present Address: Bayavü Colony, Kohima ta jangjaogo.

Iba tatalokba dak sendakba nung ken o ka benoka bushisüngdang tenzüka lir, ta sangdong ka ajanga ashi.

Mangkolemba SDPDB senden menogo

Dimapur, Aami/June 10 (TYO): Ita shia amenba Mangkolemba Sub-Divisional and Planning Board senden June 9, 2025 nü Customary court, Mangkolemba nung Minister, Tourism and Higher Education, Nagaland, Temjen Imna Along lenisüba nung agia liasü, kong SDPDB Mangkolemba Vice Chairman aser ADC Mangkolemba, Moakumzuk Tzudir aser District Planning Officer, Mokokchung dena liasü.

Minister Imna Along-i senden nung jembidang, Longnak, Tsurangkong aser Jangpetkong lenmangtem tajungba kuma yanglushiba nung teimla aliba lemsatp aser Foothill Road densema tongtipang lenmang tem den sensaktepba ajanga terenlok tsütsü nükla tajung lir, ta ashi.

State nung subdivision tambusang süaka metokmeperei balala ajuruba indang jembidang pai sorkar ketdangsür dang nübur asoshi tali bendanga agütsür inyaktsü ayongzüka liasü.

Pai SDPDB Mangkolemba züngsemtem dang nüburtemi timtem ajuruba bentettsü asoshi anibelem mesasai inyaktsü ajungshia liasü.

Iba den ano subdivision terenlok asoshi senden nung

dena aliba stakeholders ajunga dang teka amteper yariteptsü ayongzüka.

Iba senden nung CHC Mangkolemba ya CMHIS kübok empanelled hospital nung z ü n g o k s e m d a k t s ü t s ü , yimtsüngtem indang MGNREGA bank accounts tem Mokokchung headquarters nungi Mangkolemba subdivision dangi bener arutsü, Alongkima aser Longnak jila tem nung urban sub-station amenoktsü, Puneboto yimdak aliba school Mithite yimtsüingi belentsü, Mangkolemba town nung market complex yanglutsü aser Mangkolemba nung town council office amenoktsü indang onüktem jembia liasü.

Maneni Longchem circle nung lenmang kanga majungba aser Akumen village nung border guest house yanglutsü onüktem jembia liasü.

Teloki kanga junga asadanger, item proposals ya tejanga aser tongtipang ta ajiteta sorkar dangi yoktsü pangjema liasü.

Iba den Social Welfare Department, Rural Development Department aser Education Department ajanga pei department sasep maparen balala inyakba indang PowerPoint nung lemsatpala liasü.



NAGALAND POLLUTION CONTROL BOARD

Signal Point, Dimapur – 797112, Nagaland
 Tel.: 03862-245727, TeleFax: 03862-245728
 Website: www.npcb.nagaland.gov.in e-mail: npcb2@yahoo.com

AMBIENT AIR QUALITY FOR KOHIMA AND DIMAPUR CITY

KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring dates		Permissible limit As per the National Ambient Air Quality Standards “Iba tasazük alemabo metudaktsütsüla”
				03.06.2025	05.05.2025	
1	Dimapur	Bank Colony	Residential	106	96	<u>100 µg/m³</u>
2		Dhobinala	Commercial	110	91	
3		NPCB Office, Signal Colony	Residential	56	62	
4		Nagarjan	Residential	83	86	
5		Viola colony	Residential	54	46	
6		Burma camp	Commercial	114	90	
7	Kohima	Opposite NST Office	Residential	54	32	
8		PWD Junction	Commercial	58	34	
9		High School Junction	Commercial	62	48	
10		Midland (Upper)	Residential	50	35	

Iba osang ya nübortem ajangzüksü atema Nagaland Pollution Control Board-i agütsür.

Iba osang ya nübortem ajangzüksü atema Nagaland Pollution Control Board-i agütsür.

Pakistan nung airbase ti amakba ajanga rara anen: Jaishankar



New Delhi, Aami/June 10 (Agencies): External Affairs Minister S Jaishankar-i Paksitan aser India na May 10 nü ceasefire benokba kuli agütsüogo, aser ashiba agi, May 10 nü India-i Pakistan indang airfields tongtimbang ti maka raksatsüba ajanga dang rara anena liasü.

American news website POLITICO den sensaksema mapang Jaishankar-i, kiralongrartem nem Pakistan sorkari teyari agütsüba atema India kanga tezü adangba lemsatepba den amokmerentem agintsü atema military-i indang indanga jenjang agitsü New Delhi renema aliba nenshia metetdaksüogo.

"Parnok Pakistan teyong nung liaka onoki kecha hau ta

mali aser onoki Pakistan teyongi ia amaktsü," ta Jaishankar-i India kidanger amokmerenba den kiralongrartem terai lua raratsü atema India bendang agütsür aliba osang tesashi ka agütsüogo.

"Pakistan-i kiralongraba ya state police indang hadir ka ama amshir. Ken o ajakiji aji dang lir," ta pai Brussels semdangba mapang POLITICO dang ash. Minister-isa, linük ana tera agi dang meraraba tensa ya tang tashi mejui ali asü ta asüngdangba mapang, "kiralongraba inyakyim nem bendanga agütsür aliba ya mangatettep tera ka ta shira tensa maneni mejungi lir," ta pai ash.

April 22 Pahalgam maka civilain 26 tepsetba sülen India-

i May 7 nü operation Sindoor benoka Pakistan aser Pakistan-Occupied Kashmir nung kiralongrartem tesep teku amak aser kiralongrar noklang aika tepseta liasü. Iba sülen Pakistan-ia drone aser missile amshia India amaktsü merang saka India indang air defence system temi item ajak nokdanga liasü. May 10 nü India aser Pakistan nati ceasefire benoktsü mulungtepa liasü.

Ceasefire aser India nunger indang jet raksaba indang jembiba mapang Jaishankar-i POLITICO dang ashiba agi, "Rafale aser tanga system tem koda tetangshi liasü, aji Pakistan nung airfield tem raksar aliba ajanga kuli agütsür."

Paisa, "May 10 nü rara ya kuli ka agi dang anena liasü, koba May 10 anepdang onoki Pakistan nung airfields tongtimbangtiba ti amak aser inyaksangshi mejungi kümdaktsü liasü. Iba ya kü o masü saka Google nung noksatem nung angutsü. Runways aser hangar tem raksar aliba nenoki angutsü," ta ash.

Pakistan Air Force (PAF) fighter jets trok, jenjang aketba tayimtsü ana, Unmanned Combat Aerial Vehicles (UCAVs) 10 dak tema, C-130 transport aircraft ka aser cruise missile aika India Air Force-i raksaja liasü.

Ato Kilonser Modi-i Cyprus semdangtsü



New Delhi, Aami/June 10 (Agencies): Europe nung tensendaktep atsülangshitsü atema India-i jenjang agiba mapang PM Narendra Modi-i G7 summit nung adentsü asoshi Canada-i aoba mapang Cyprus semdangtsü aser meyipa tarui Croatia semdangtsü.

Cyprus aser Croatia naprongla EU züngsem lir aser Cyprus-i taruba küm tetenzüklen EU Council tir mapa abentsü. Modi taoba ita Croatia den Netherlands aser Norway-i aotsü liasü, saka India aser pakistan na mangatettep adokba sülen thinena liasü.

G7 summit ya Alberta kübok Kananaskis nung June 15 nungi 17 tashi agitsü aser Modi tatembangbuba anogo outreach session nung shilem agitsü. Canada-i ajungbena jaokba tetezü PM Modi sentong tang tashi mejangjai lir, saka sorkar

source-i ashiba agi, bilateral sendentem amentsü atema jenjang agidar.

A B Vajpayee-i 2002 küm aser Indira Gandhi-i 1983 küm semdangba sülen Modi ya Cyprus semdangba India PM tasembuba asütsü aser India aser Turkey na mangatettep adoker aliba teyalong nung semdang asütsü. India-Pakistan na taoba mapang mangatettep adokba mapang Turkey-i Pakistan pusema liasü.

Ankara-i Turkish Republic of Northern Cyprus agizüka Turkey nunger sepaitemi 1974 küm iba tesem atsüngba aser Eastern Mediterranean nung gas exploration temeden dak sendakba nung mangatettep aliba ajanga Turkiye aser Cyprus nata tensa mejungi dang arudar.

India-i, Cyprus tebilemtsü ya UNSC bangzüng aser

international temzüng özüng dak ajemdaker bentettsü pusema arudar.

Turkey-i Pakistan pusema mapang India-i Cyprus aser Greece na den tesendaktep yanglushitsü merangdar, koba defence aser security cooperation dak rangloker lir. 2023 küm Athens semdangba sülen Modi ya küm 40 tsüngda Greece semdangba mezüngbuba PM aküm.

Linük anapronglai kiralongrara inyakyim aser Kashmir ken o dak sendakba nung India pusema aruogo. UNSC nung India election, India-US Civil Nuclear Agreement, NSG membership aser 1998 küm nuclear tendangba mapang Cyprus-i India pusemogo.

Modi-i Croatia semdangtsü aliba ya India nung PM kati iba linük semdangba mezüngbuba asütsü. S Jaishankar ya India nunger foreign minister tem rongnung iba linük semdangba mezüngbuba foreign minister aküm. Linük ana tsüngda bilateral tesendaktep atsülangtsü merangba mapang pai 2021 küm Croatia semdanga liasü. Iba sülen India aser Croatia na defence cooperation atema MoU ka nung sign süa liasü.

China-i Indian Navy nem tenüngsang agütsü

New Delhi, Aami/June 10 (Agencies): Hombarnü Kerala tzüküm anasa khu abenba rong ka nung mi adoka langka kar apokba sülen rong nung mena alir parnok 18 kümzüka atema India nung Chinese embassy-i Indian Navy aser Mumbai Coast Guard dang kanga pelaba lemsatepogo.

"June 9 nü Azhikkal, Kerala nungi 44 nautical miles pilar MV Wan Hai 503 nung langka kar poka mi adoka liasü. Rong nung crew members 22 aliba nung Taiwan nungi parnok 6 densema China nunger 14 liasü. Indian Navy aser Mumbai Coast Guard nati takaratiba nung jenjang agiba atema onoki tenüngsang agütsür," ta India nung Chinese embassy otongdar Yu Jing-i Mongolbarnü X nung post sütsü.

Jing-isa, tekümzüka maparen maneni takok ngua aotsü aser yirur aliba crew member tem takaratiba nung taneptsü angutsü imlaja ataba lemsatepogo.

270mtalang Singapore wako songer aliba rong ya Colombo, Sri Lanka nungi June 7 nü apusoa liasü.

Iba rong ya Mumbai anasa Nhava Sheva port-i oya aliba mapang Hombarnü anepdang mi adoka liasü, ta Indian Coast Guard (ICG) PRO-i ash. Iba rognung nung containerised cargo bena liasü aser crew 22 mena liasü. Crew 18 bo kümzükogo, saka pezü samar bushidar.

Yirur alirtem ya INS Surat-i kümzüka aser Panambur nung New Mangalore Port Authority (NMPA) Coast Guard berth-i anir ao. Iba sülen parnok ya Hombar aonung Kuntikana nung AJ Hospital-i anir oa liasü.

Mi adokba anguba sülen New Mangalore nungi ICGS Rajdoot, Kochi nungi ICGS Arnvesh aser Agatti nungi ICGS Sachet nunger teyari agütsütsü yoka liasü.

ICG ketdangsürtemi ashiba agi rong nung mi bo aziökogo.

"Indian Coast Guard (ICG)-i aerial surveillance aser tensa asadangtsü atema life rafts bener Dornier aircraft ana yoka liasü. Specialised firefighting aser pollution response vessel tem densema ICG rong iba tesemi yoka liasü," ya ICG-isa shisem.

Bastar nungi Naxalism mesamatsü tashi onok manentsü: IG Bastar



New Delhi, Aami/June 10 (Agencies): Chhattisgarh kübok Sukma district nung IED ka apokba nung police office ka asüba sülen IG, Bastar Range Sundarraaj P-i Mongolbarnü lendong atalokba tesem semdangogo aser ashiba agi, Naxalites anema raratsü atema police renema lir.

Bastar nung Nazalism mesamatsü tashi police-i manentsü, ta pai shisem.

Lendong atalokba tesem nungsa Naxalites temi rema toktsüba Improvised Explosive Device ka Mongolbarnü ngutetogo, ta pai ash.

Hombarnü tatalokba nung densema aliba Naxalites tem aputsü atema security force temi meita aoba sentong ya ayongzüker inyakdar.

Hombarnü Konta police station kübok long atepdak ka nung Naxalites temi rema toktsüba IED ka apokba sülen Additional Superintendent of Police Akash Rao Girepunje tepset aser tanga police office ana yirua liasü.

Mongolbar anepdang bomb apokba tesem semdangba sülen Sundarraaj, Konta police station-i ao aser police

personnel tem den sensaksema liasü.

Pai asür nem aküm tetushi agütsü aser pai pa taküm bendanga agütsüba amajok masütsü ta ash.

Sepaitem den sensaksema mapang IG-i ashiba agi, parnok lenla ajak nung renema lir aser Naxalites den tashi ita raratsü.

Paisa, Bastar Range nung aliba security personnel ajak dang tashi ita, temulungtetba tulu nung tetsükdaktsütem kokteta alitsü ayongzüka liasü.

Hombarnü tatalokba sülen Bomb Detection & Disposal Team kati iba tesem temeket ajunga bushia ao aser ano IED ka remja aliba nguteta defuse sütsüogo, ta pai ash.

Iba team yagisa iba tatalokba nung amshiba pressure IED components tem nguteta liasü.

Ken o dak sendakba nung Konta Police Station nung FIR ka benokogo aser bushisüngdang maneni südar, ta ketdangsüri ash.

Girepunje, shiba Raipur district nungi liasü, pa 2013 küm deputy superintendent of police ama shim. Pa taoba küm March ita nungi ASP, Konta ama inyaka liasü.



TIR YIMYIM YIMOBILEM (EDITORIAL)

DIMAPUR WEDNESDAY, MAY (AAMI) 11, 2025

Tejashitsü aika!

Tawa Chumoukedima district kübok Unity yimtak Naga yimten nüchiso bushir telok kati Naga yimten nüchiso telok ka nung tanishir ka ki amakba maparen nung aibelener aputsü atema ken o agüja liaka, tang tashi police-temi meputetba asoshi mepelaba sayua tanü Chümoukedima district kübok National Highway 29 südaka aliba yimtsüng 13 longjemer parnok litsü nung aliba shishilemba tesem anepdang 6:00 ako nungi 12:00 akok tashi shibangtsü aser tesem ajaklen nisan tanak songer longkak aita amongtsü lemtetbaji, Naga yimten nüchiso bushirtemi nübortem mepelatsüsa inyakba anema tejashi marem ayongzükba sentong ka asütsü. Atangji, Nagaland nung Naga yimten nüchiso temeten indang jembirbo mali saka Naga yimten nüchiso bushir telokang aika kümogo. Iba jagi Naga yimten nüchiso jenjang tajung ka latettsüba masü saka saruang züintsü aser saru sarua-sarua saru sarurtem rongnungjiang meputep adoka akhi amato azü tokshia rarateptsü ana nung dang lir. Aji oda, National Highway 29 südaka kuma aliba yimtsüngtemi ashi ama, joko Naga yimten nüchiso bushirtem alitsü asoshi lemozüksüba tesemtemji ozüing raksartem jenokdak tesemang ka kümogo, kechiyong ajungyonga-majungyonga Naga yimten nüchiso bushir telok asünungji India government den yimjung yangluba maparen nung parnok alitsü lemozüksüba 'designated camps' telongi Indian police aser sepaitem aitsü memelar, anungji ozüing raksar süaka Naga yimten nüchiso bushir alitsü lemozüksüba tesem nung ali tashibo shingaia kecha meshiteter. Naga nunger asoshi aji junger amai bilemstsüa akok, saka lia lia mekümdangra tanü Naga nunger asoshi yimten nüchiso bushitsür alitsü mekazüka yutsüba tesem 'designated camp'-temji ozüing raksar jenokdak aser adenshidak kümadoktsü aser shingaia kecha mashiyonga yangji alirtem o yangji alirtem na temulung melemtep aser meputep adoka lendong tulu ataloktsü. Aji dang masü, tanü Naga yimten nüchi bushir lenirtem ki dena mitkartemi meketbanger alitsüsa akümba tensa tia ya kodang jungjunga bilemdangdir, ibai asenok asoshiyo yimjung mapang masü saka shisabolua alitsüba mapang ka lir. Asenoki yimjung mapang ya injang ola anenba mapang dang ajar amai bilemer saka injang aser bomb ola anenba kijaji yimjung mapang masü, mesüra asenoki angatettsü asoshiyo lepteptsüngtep anenba kisüngjia yimjung mapang masü, saka shitakba yimjung mapangjibo nisungtem mulungjang nung tetsübu maliba mapangji dang yimjung mapang lir. Ajisüaka, Naga lima nung Naga nunger asoshi yimten nüchiso bushitsür telok paikaya adoka yur, Unity yimtak amaji tesem balala nung Naga yimten nüchiso bushir telok balala nung lenirtem alidak sepai camp amai kümer aliba dangji yimjung lima aser yimjung mapang ta ajatsü makoktsü. Kasaji, shishilembadaker aser office nung Naga yimten nüchiso bushir telok atemer teloksa telok sen meshii aru tsüba amenba anogotemji yimjung anogotem masü. Kasaji, Naga yimten nüchiso bushirtema India government-i mekazüka yutsüba tesem nung Naga yimten nüchiso mangu tashi amongtsübaji yimjung mapangbo masütsü. Ibajiang shitakba nungbo nüchiso angutsü melen India government nem ajak külemi puoka yudaktsüba mapa ka asütsü. Aji oda, asenok jungjunga nüchi kuma arur bilemdangra, asenok yimten nüchiso bushirtem alitsü asoshi mekazüka yutsüba tesemji "designated camp" masü 'alternative jail' ki lir ta angatettsü. Idakji lia asenok meputepba meputepba akümer, kechiyong yangji yimten temeten indang jembitsü melen alima rongsen indangang jembir aser pei jenjang ulutsüba indangang bilemer. Ibayongji, longjemer külemi Naga yimten asoshi inyaktsü melen kati ka arishi tenzüker. Atangji, ibai tejashitsüka aser ano Naga lima nung tejashitsü aika ataloktsü. Itemji matalokdang Naga yimten nüchiso bushirtemi India government-i mekazüka yutsüba tesemji toktsütsü tim, kechiyong India government-i mekazüksüba camp nung liabo akhümкета agizüktettsüsa Naga yimten jenjangbo melatettettsü. Ashiko, alima nung yimten nüchiso magütsüneri lemozüksüba 'Designated Camp' nung lia yimten nüchiso jenjang alangtetba kinbo malitsüa akok.

OLEMSABANG

Yimsüsür dak nüburi tamang kaatettsüsa yimsü asütsüla

~ L. Kika Pongener

(Yashi adok nungi...)

Tanü asen lima nung terenlok mapa tasen inyaktsü long azüingba (Foundation stone lay-out) osangbo aika angur, saka mapa renemer lapokba/semzükba (Inauguration)-bo aikabo mangur. Dimapur nung Stadium ka yanglutsü tenzükba küm aika merinemteti menentoka yua lir. Ano Kohima nung High Court Complex yangluba tanü tashi merinemteti yua lir. Asen Naga nunger sorkar rongsen tarulen reprangdangra, noklang nung 90 % center sorkar dak metaloka lir ta ashitsü akok, kechiyong asen lima nung revenue angutsüba lenmang aikabo mali. Aji oda, center sorkar nungi terenlok mapa inyaktsü nungdem nung senbo aikasa arur amai....Saka terenlok mapa inyakbabo aikabo mangur. Otsüla oboula nungeri shin o jembiba otsü ka....Mapang ka nung Molosongzü o Shirong na tembar yimteper....Molosongzü-i Shirongji par kidangi chiyungi jaok. Aser kodang Shirong-ji Molongsongzü'er kidangi aru, Shirong-i Molosongzü'er ki kikümdongji jungjunga reprangdang nung....Shiruru tapu aika ayiba tsüingnep (Foot-print)-bo lir, saka meyipa adokba tsüingnepbo ka danga mangu.....!!! Kechiyong Molosongzü jagi par kidangi aitba shiruru ajakji ngohseta achiba agi meyipa adokba tsüingnepbo kata maliasü. Iba otsüji mesuka.... Asen Naga nunger dangi center sorkar nungi senbo aika arur, saka iba sen jagi terenlok mapa inyakbabo aikabo mangur. Ano India lima nungi Train/Truck Gari sunga osettsüset/chiyungtsübo load aikasa bener arua oshizüker....Saka asen lima nungi meyipa bener yokba-bo kecha maka. Molosongzü'er kidangi shiruru ayiba kata meyipa madokbaji mesuka lir.


Ano mapa meinyak ser sen merijang/lakh/crore aika tiyazü bill yanglur agizüka agiba, ashiko, sorkar maparen kar nungbo alitsü akok....!!! Ano yimtsüng terenlok mapa inyaktsü aser sensakertem yaritsü atema sorkar-i Mahatma Gandhi National Rural Employment Gurrantee Act (MGNREGA) Fund ajanga sen agutsüba nunga Department-i percentage (%) meshiba atema nüburtemi ola adokba osangkaket nung nguogo. Anungji sorkar ketdangsertemi anir yimtsüngtem nung yimsüsürtemi MGNREGA fund jagi terenlok mapaji shitak ketdangsua inyaktsüla aser Job Holder nema taa/hajira shitak agutsütsüla. Ano jila/yimtsüng nung sensaker pei alitsü ki meyangluteter nem, sorkar-i ki yanglutsü atema teyari agutsüba sen nunga, Department nung ketdangser aser yimtsüng nung yimsüsürtemi ochishia ketdangsua mamshiba-a tesem kar nungbo alitsü akok. Ano yimtsüngtem nung yimsüsür Council Chairman/Secretary/Gaon Burah-temi Permanent Resident Certificate (PRC) senotsü tera-ka agitsü mechi nung, Naga nunger masüba tzüma-longmar nem tapi-tapi agi aguja tesem kar nungpo alitsü akok. Ano sorkar ketdangertemi Indigeneous Certificate ya tzüma-longmar tejangja memetetba nisung nembo magutsütsüla. Ano Jila-tem nung Colony/Sector nung Village Council/GB's aser yimtsüngtem nung yimsüsürtemi Permanent Resident Certificate (PRC) yabo nisung tejangja meteter dang agutsütsüla, kechiyong iba nungji timtem tetsükdaktsü aika lir.

Ano jila aser yimtsüng kar nungbo Council Chairman aser Gaon Burah masüba (Self Style Cairman & GB) tem-ia senotsü angutsü mechi nung, Permanent Resident Certificate (PRC) ya agutsüa/amshia alitsü akok....!!! Iba ama sen teraka ajangzüksü mechi nung tim mesui ochimashi mapa inyakba jagi kenu asen Naga lima dangi lendong-timtem tulu bentsür arutsü, aser sorkar nungi shir alua tilatiba (Grassroot level) yimtsüng putu menden tashi nung tebilemstsü khuret tulu bentsür arutsü. Talisa, iba Certificate nungji ajemdaker tzüma-longmartem aser bendangertemi Indigeneous Certificate yanglutsü aser item chirnurtem jagi asen Naga nunger lisopur jala-jabasotem den Engineering, Medical, Allied Degree balala azüing aotsüba atema seat rakteptsü aser sorkar mapai ayitsü atema post rakteptsü. Anungji iba amala tim masü inyakba mapatemji sorkar dak dang metaloker meli-i, kaketshir-temi anir mulongtet telok ajaki kanga suoki yia tenuk yoka reprangtsüla. Tila-teri mechi-menu mapa amai bilemstsü akok, saka ibajagi tarutsü nung timtem tulu bentsür arutsü. Ano jila tulutem nung tzüma-longmartem Sector/Colony nung Gaon-bura shima inyakdaktsüba ya kangasa mebilemdangi inyakba mapa ka asütsü, kechiyong parnok jagi parnok ajungtsü apia inyakdang lenmang aisu aserinyakyim aika nung asenok lisopur atema timtem tulu adokdaktsü.

(Maneni asüing adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pastor Schonemann tepsetba nung temulung melemi alir jangjaogo



Arizona nung aliba New River Bible Chapel nung pastor William Schonemann noksa nung angur.

Arizona, Aami/June 10 (Agencies): Arizona nung aliba New River Bible Chapel nung pastor William Schonemann asüba dak sendakba nung temulung melemi alir ka jangjatetogo, ta Maricopa County Sheriff indang office ajanga ashi. Pastor Schonemann ya April ita pa indang yipten nung sür aliba ngutet, kong pa teka ya wall nung angenloka liasü.

Ketdangsür temi temulung melemi alisang tenüng mesangdong, saka 12 News ajanga Hokulbarnü ashiba agi, iba nisungba ya sendaktepa maliba ken o dang aka nung ozüng amshiba agency balakai apu. Iba dak alia osang tali tejangjaba magütsü aser Hombarnü The Christian Post ajanga asüngdangba nunga Maricopa County Sheriff indang office nungia osang tasen kecha magütsü.

Schonemann'er kibong, tembartem aser par arogo züngsemtem pa tepsetba ajanga aoksakanger lir.

"Kü mulungjangi kecha marur, kechiaser iba lima nung iba nisung tepsetner nisung aliba

ni mamangteter," ta Schonemann-i küm 30 dak tema aniba arogo nung züngsem aser tembar Diane Brown-i ashi.

"Bill ya kü tembar tajung ka liasü. Ni kinungbo süadoker aser pai iba mapang ni kanga yari. Pa kinungsü shidangrang ni yaria liasü," ta Brown-i bilemteta 12 News dang ashi.

Schonemann'er jabaso Randall Schonemann-ia taoba mapang AZ Central dang pa tebu asütsü meimlai liasü ta ashi.

Pa tebu ya US Navy veteran ka liasü aser pa Vietnam War nungi meyipa shilangba sülen Tsüngrem tenzük, ta ashi. Crystal Schonemann tena kibong kumer küm 49 lia arur la 2022 küm asü aser iba sülen kübui arogo nem mapang tali agütsü, ta Randall Schonemann-i ashi. Tebu ya ajak den sako aser gari yanglushiba mapa inyaknüa liasü, ta pai ashi.

Tebu tepsetba indang bushisüngdangba nung tang tesüsa terenlok aliba ya lenmang shidak nung mera agiba lir, ta pai Hokulbarnü 12 News dang shia liasü.

"Iba mapa inyakba nisungba ya asenoki kodanga

mangatettsü ama nibo bilemer. Nisung kati kechiba iba ama inyakar ni mangatettsü imlar," ta pai 12 News dang ashi.

Arishi küm 76 tain Schoneman ya par kidang April 28 nü sür lia ngutet, ta bushisüngdangrange temi taoba mapang shia liasü.

Pa süa aliba tesem nung tim masü mapa inyakba kuli anguba ama parnoki ashi saka tali rasaa mashi. Iba sülen osang balala ajanga Schonemann dak yiruba zübu aika liasü ta ashir. Pa ya pa indang yipten nung teka salar wall nung angenloker süa aliba ngutet ta ashir.

Arogopur tem parnok pastor asüba mamangteti jashir, saka tang pa tesunep nung lir ta angateta parnok temulung anisüngzüker, ta Brown-i ashi.

"Onokya san ishika sannüker samar lir, aser ya kangasa tasak lir," ta pai 12 News dang ashi.

"Pa kong aliar onoki meteta lir, aser ibaji ajanga onok temulung nung anisüngzüker angur. Pa takum agiba yimya maginer, saka pa tesunep nung lir ta ni meteta lir," ta Brown-isa ashi.

Pua bener aoba putir asoshi Nigerian bishop-i sarasadem akhanger

Maiduguri, Aami/June 10 (Agencies): Jihadists temi pua bener aoba putir ka kumzüksü asoshi temaba nungi sayatenya inyakang ta sarasademtsü Nigerian bishop kati akhanger.

Auxiliary bishop of Maiduguri, Jogn Bagna Bakeni-i ashiba agi, par arogo nung putir ka, Father Alphonsus Afina den dangar ishika June 1, 2025 nü Boko Haram/ISWAP (Islamic State West Africa Province) züngsemtem südi ta temulung melemi aliba nisungtemi pua bener ao.

Boko Haram yagi iba ama nisung pua bener aoba mapa inyaker, aser parnoki tamajungtiba ya 2014 küm inyak, kodang parnoki school azünger tetsür 276 pua bener oa liasü. Iba tatalokba nung tetsür kar jena otet, kar asü aser 80 shi tang tashi samar bushiteper aser iba kiralongrar teloki pua

yua lir ta amanger.

Bishop Bakeni-i Catholic charity Aid to the Church in Need dang ashiba agi, "Father Alphonsus aser JDPC (Justice, Development and Peace Commission) nungi züngsem ana ya workshop ka nung adentsüba liasü, koba Maiduguri nung Hombarnü tenzüksü liasü aser parnok ya Mubi nungi iba tesem bushia aorba liasü."

"Iba tia maka lendong ya Gwoza anasa anüngdang 12:30 ako meta atalok."

Jihadists aser Nigerian security services tsüngta khatepba mapang putir aser pa den yariteper tem taolen makai akum südi ta amanger.

"Nisung takum samaba aser pua bener aoba jenti lir. JDPC züngse ka khaset. Father Alphonsus ya dangar tem den pua bener ao, aser JDPC staff ka jena arutet," ta bishop-i ashi.

Iba sülen jihadists temi bishop dang Father Alphonsus tang tashi takum lir ta kuli agüja arur.

Bishop-i nüburtem dang pua alir tekeraba nung chioktsü aser Maiduguri arogo asoshi sarasademtsü ayongzüker.

Boko Haram ya Islamic State indang West African kongsang asütsü ta par sasa 2015 küm sangdongba sülen khenbo parnok dang ISWAP ta aja. Ajisiüaka 2016 küm IS-i iba telok indang lenir melentsü merangba ajanga telemsa adok.

Iba sülen Boko Haram ya ISWAP dena rarar aser Nigerian sorkar dena rarar.

Aid to the Church in Need ajanga ashiba agi, taküm tamanger ketdangsür pua bener aoba nung Father Alphonsus ya 15 buba lir. Pua bener aor ana tepsetogo aser tanüngba ajak tangbo chiokogo.

ANOGO ABEN TSÜNGREM DEN

Sarasadem ajanga sentsü melen

"Aser pai sarasadem dang, Pa tejak tereprangtsü melena adok"- Lk. 9:29

Kodang asenoki alima nung Kibuba indang bushidir tenem kolak ama tatalokba tenet teti angutsü. Item tenetji Pa asoba,baptiba, atitangba, sentsü melenba, kangki nung angenlokba, tasü nungi shia aruba aser kotaki atuba angutsü.

Kibuba Yisu taküm nung tatalokba rong nung tiyongtsüji Pa sentsü melenbaji alitsü, aser ibai tetezü aketba tenem temejongji alitsü. Ibai Tebui Techir dak temulung achiba jungkai adokba lir. Ano iba yagi asen Kibuba Mosa aser Elija dang nungi temaba ta jangjatsüba lir.Iba yagi asen Kibuba Pa yimli nung sentsü wangshia arutsü indang sayur.

Saka asenoki Luke 9: 29 nung aliba ojang asemji " Pa sarasadema alidang" sendokra asenoki tanelaren tayongzükbaba sendoker. Pa sarasadema alidang Pa tejak melenshi. Asenoki teti sarasadema lira Kibuba dak kichi atalok aji asenok daka ataloktsü. Tanelaren asenok daka terenlok kaa akümtsü. Anungji asenoki asen nükla nung Kibuba sentsü melenba yur sarasademi temelenshi adokdaksübaji reprangra -

Mezüngbuba nung, taküm jenjang tangatetba melenshitsür. Chichiba sarasademji asen tanelaren tenem kolaki atuba lir.Tenem kolak nungi alima noksa melenshia anguba ama sarasadem ajanga tanelarena melenshitsü. Kodang tenem kolaki tudir lenden nungi manguba tongtipang osettem tenem kolak nung jagi angur. Lenden nungi ki tulu ta anguba to tenem kolak nung iba ki tuluji tajento tila ka ama dang angur. Lenden nung tongtipang masüba osetem to tang tenem kolak nung tongtipang oset akümer, kechiaser lenden nungi nüngdak ajakbo ayimjema mangur.

Kodang asenoki sarasadem ajanga Tsüngrem tenemi tudir asen nüngdak aser tashi mait ajak aseni angur. Iba tenem nungi asenok Tsüngrem den lungjemba tesademba aser takangba angur. Mesükba aser chichiba ulubaji asenoki jangjaa angatetter. Lenden nung asenoki kanga tulu ta repranga aser bilemba ajak Tsüngrem den lungjemba tenem nung kanga ilaa angur.

Miim sarasadem tenem nungi Tsüngrem tenüki anguba ajak asenoki angur. Oset tulu ajak tila ama angur aser tila ajak tulu ama angur. Shi tejangraba tuluji, taginü tuluji sarasadem tenem nungi kanga tila angur. Kotaker mangdangji dang amungtema alitsü. Ti yazü aser ochi sarasadem tenem nungji jangjatsür. Asenok taginüba, shisabulu, tebilemtsü, sentong, mapa inyakba ajak idakji sütepa adoktsü.

Asenoki maneni miim sarasadem aliba ajanga ya ataloktsü. Kotaker Tebu den asenok miim temulungjang aliba ajanga ya ataloker. Asenok takok jenjang aliba temabai ajungketer. Kodang asenok temeyoktep lima nung ajungketer; kotaker tenük agi anguba osettem asen tenük agi angutsü. Iba anogo koda tepelatsü anogo asütsü!

AO OSHI ANGAZÜKDAK:**TANÜ ANGAZÜKTSÜBA OJANG****Tenü**

(n) obala teyi tenu dang ajaba, onü (paternal aunty)
* Kü kinüngtsü tenü nungertemi la kanga meimer.

Tenük

(n) temang nung ngudaktsüba shilem (eyes)
* Tzü temekong temerük agi tenük teti shitoktsüla.



Tir Yimyim

OLONG PAITEP # 7178

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

- O jembitsü tashi - 8
- Süngjang tapu ka - 5
- Tekanük nung enokba - 5
- Teka amtep - 5
- Tzüik asendak - 5
- Tsüngpang tema aliba - 5
- Ken atenba yimya - 5
- Asangur - 8

LANGTSÜNGLEN

- Tepok telung nung shilem ka - 7
- Tamajung aküm - 5
- Chi den külemi achiba - 3
- Meimchir alimai aruba - 3
- Laishiba nung ayong ka - 4
- Tarutsü nükla - 7
- Tamendakdak/Nükjidong - 4
- Tenük-telen mejungi aküm - 5
- Terok nungi adokba - 3
- Meimchir telemsa - 3

OLONG PAITEP # 7177 TELANGZÜBA**TIPIEN :**

- Taa, 3. Teküm, 6. Aibelen,
- Aut, 9. Ajizük, 10. Ojala,
- Semer, 13. Sen,
- Kioiktsü, 17. Itsük, 18. Kar.

LANGTSÜNGLEN :

- Tai, 2. Asensor, 3. Tanü, 4. Kua,
- Mitsüktsü, 6. Azübenshi, 8. Lah,
- Jangkok, 12. Akok, 14. Nashi,
- Sür.

NAI-A YA METETTER MA

Karnataka nunger kentener Yashavanth M G-i ghonda 24 nung ken 270 tashi atenba ajanga Golden Book of World Records nung züluokogo.

Yashavanth-i playback singer Dr. SP Balasubrahmanyam indang ken 270 tashi non-stop aten. Iba sentong ya Baalagaana Yashoyana liasü aser June 3 nikongdang 3:00 ako nungi tenzükba June 4 nikongdang 3:00 ako nung tembanga liasü. Dr SP Balasubrahmanyam asoba anogo nüngtem nung solo singing marathon ya ayonga agi.

"Operation White Veil" nung heroin aser opium aika apu

Imphal, June 10, 2025

(Agencies): Manipur kübok Churachandpur district nung arrtsülen "Operation White Veil" ta ser joint operation ka agiogo.

Iba mapa ya June 5 nungi 7 tashi cross-border drug trafficking anema inyaka liasü. Iba mapa nung Directorate of Revenue Intelligence (DRI), Customs, 37 Battalion Assam Rifles, aser Manipur Police külemi yaritep.

"Operation White Veil" nung Rs. 54.29 crore alang heroin 7,755.75 grams aser Rs. 87.57 lakh alang opium 6,736 grams apu.

Ozüng amertemisa Rs. 35.63 lakh, Baofeng walkie-talkies ana, aser Maruti Eeco van ka apu. Maneni, Narcotic Drugs and Psychotropic Substances (NDPS) Act, 1985 kübok nisung pungu pua lir.

June 6 anepdang Indo-Myanmar arrtsü anasa Behiang village nung sepaitemi Maruti Eeco van nung nisung ana dak temulung melemi reprang.

Tena ya Thadou Veng, Singngat Sub-Division nung ki kati aodang apu aser iba kidang sapon pongdang 219 nung heroin, small tin cans 18 nung opium aser Rs. 7,58,050 den

walkie-talkies yua aliba apu.

Nisung ka iba tesem nung apu saka ka jena aotsü merangba Bualkot Check Gate nung apu. Behiang village nung tena ki mita aodang opium packages ana aser Rs. 28,05,000 ngutet.

Osang tejanga ka angazükba nung ajemdaker sepaitemi June 7 nü Zoukhonum Village nung nisung ana apu. Tena ket nung sapon pongdang 440 nung heroin bona aliba apu.

Parnoki heroin ya Myanmar nungi Indo-Myanmar arrtsü ajanga Churachandpur district-i bener aruba bushisüngdang ajanga putetogo.

Assam-i 1950 Expulsion Act kübok bendanger 330 meyipa yokogo

Guwahati, June 10, 2025

(Agencies): Assam nungi ozüng alema arur nisung 330 tashi meyipa yokogo ta Chief Minister Himanta Biswa Sarma-i ashi.

Iba mapa ya Immigrants Expulsion from Assam Act, 1950 kübok inyak. 2024 Supreme Court obendang ka nung Assam nung senso atema cut-off year 1971 ta latettsüba sülen iba mapa inyakogo.

Supreme Court obendang ajanga state sorkari Foreigners Tribunal dangi moi iba mapa inyaktsü temelaba agütsür.

"Okadaki 1950 law taküm lir ta jangjatsüogo. Tang nungi District Commissioner temi

bendanger ta temulung melemi bilemer ajak meyipa yoktsü akok" ta CM Sarma-i ashi.

"Nisung 330 yokba shinga meyipa maru. Karbo okadak ken o benoka lir sernung yok saka parnok okadaki tuyuba ama meyipa anir aru" ta Sarma-i Leader of Opposition Debabrata Saikia-i asüngdangba langzüdang ashi.

NRC rejection slips menuba ya 2019 Supreme Court tetuyuba ajanga lir kechiyong parnoki tamasa NRC data junga renemtsü ashir. Iba mapa ya central agency kati inyakdar aser ita 8 nungi 12 tsüngda renemtsü ta CM Sarma-

isa metetdaksü.

Tang bendena aliba NRC nung aibelen alitsü aser iba ya taila tenüngtem mesüra duplicates amala asütsü. Sorkari arrtsülen alirtem tenüng 20% aser tangalen alir 10% reprangshitsü shiogo. All Assam Students' Union-ia updated NRC atema takhangba agütsüogo ta paisa ashi.

NRC nung züngsema alir ka dang Tribunal ajanga bendanger ta ashitsü tenokdangba kecha mali. Deputy Commissioner kati nisung ka bendanger ta bilemra Tribunal dangi moi meyipa yoktsü akok ta Sarma-isa ashi.

Assam tsür Rosmita Hojai Delhi nung samar bushiteper

Guwahati, June 10, 2025

(Agencies): Assam kübok Dima Hasao district nungi Rosmita Hojai ta ser tetsür ka Delhi nung samar bushiteper.

Rosmita ya Haflong nungi kilometer 15 shi pilar Hojai yimtsüng nungi lir aser RRB (Railway Recruitment Board) tatidang agütsütsü atema Delhi-i aoba liasü.

Rosmita-i Haryana nung engineering studies renem aser Guwahati nung APSC exam atema renemshiba mapang ka liasü. June 4 nü tatidang agütsütsü atema la Delhi-i aoe ta lai lar kinungertem nem osang agütsü.

June 5 nikongdang lai la tetsü den jembu aser train ajanga arur ta ashi. Iba osang angashir lar kinungertem aoksatep aser tetsü ashiba agi Rosmita-i kodanga tiyazü mejembi.



RRB tatidang agütsüba sülen Rosmita den nisung ana angu. Tenati Uttarakhand nung Shivpuri Police Station nung Rosmita tzi agi ponger ao ta osang sangoktsü.

Haflong police-i iba osang ya Honibarnü lar kibong nem sangokja liasü.

Iba atema Rosmita'er kinungertem Uttarakhand-i ogo

asur kulitem bushidar. Nisung anati tzi nung ponger aoba shiaka la ano mengutet lir aser ayong nung lendong atalokba indang osang tejanga kecha magütsür.

Assam Chief Minister Himanta Biswa Sarma-i Rosmita'er kibong den osang agitepogo aser akokba tashi Rosmita bushitsü nangzükogo.

Ukraine-i Russia anema jenjang tesashiba agitsü ayongzük



Kyiv, Aami/June 10 (Agencies): Russia-i drone aser missile amshia Ukraine kübok tesem balala kanga sashia amakba sülen Ukraine tir Volodymyr Zelenskyy-i parnok den sendaka aliba anüolen aliba linüktem dang jenjang tapet agitsü ayongzükogo.

Mongolbarnü Russia-i linük yimtiba Kyiv densema tesem balala maka liasü. Russia nunger sepiatemi tawa Ukraine kanga atonga maka aruba nung Mongolbarnü amakba ya tesüsabuba asütsü aser iba ajanga Zelensky-i maneni United States tir Donald Trump dang ceasefire atema Moscow tejangraba kecha mali ta ashitsü maongka agütsüogo.

Odesa yimti nung nisung ana tepset aser nisung teku yiruja liasü, kong maternity hospital ka aser residential buildings ka maka liasü. Kyiv amakba mapang nisung pezü

yiruego aser Dnipro aser Chernihiv tesema makogo, ta Ukraine nunger ketdangsürtemi metetdaksü.

"Russia nunger indang missile aser Shahed-i, United States aser tangari yimjung atema inyakba amajok kümdaktsüogo," ta Zelenskyy-i ashi.

"Iba atema aser Russia-i iba amala mesükba jenjang agiba atema ajema ajema matai telangzüba agütsütsü kanga tongtiban," ta paisa ashi.

"America-i jenjang agiba ajanga yimjung atema Russia nongshitsü tashi lir. Europe-i jenjang agiba ya sashishia agitsüla. Linüktemi shirnoki diplomacy aser rara tembangtsü atema ayongzükdar aser koba Russia-i magizüki arudar parnoki jenjang agitsü nüngdaker," ta paisa shisem.

Russia-i drone 315 aser missiles tenet amshia amak

kong North Korea nung yangluba missile ana densema liasü, ta pai ashi. Hombar aonung drone amshia amakba ya küm asem rara aruba mapang drone amshia Ukraine kübok tesem balala amakba tesashitiba liasü.

Ukraine-i Russia indang strategic bomber fleet nung tayimtsü aika amakba sülen tang Russia-i meyiper iba telangzüba agütsüogo.

Iba jenjang agiba atema Russia tir Vladimir Putin-i telangzüba tesashi agütsütsü nangzüka liasü.

Ceasefire ken o nungi Trump atsüngzüka aoer ama bilemba mapang ka nung Zelenskyy-i US dang jenjang tesashiba agitsü ayongzükogo.

Russia aser Ukraine na yimjung atema anabenbo ajurutepa sensaksemogo aser tepuokertema melentepogo, ajisüaka kati ka amakba maneni lir.

Austria school kidang nisung ter khaset

Graz, Aami/June 10 (Agencies): Austria linük nung aliba Graz yimti nung school ka nung nisung ter khasetogo, ta police-i ashi.

Iba lendong ya yimti north-west tsütsü Dreierschützengasse secondary school nung atalok.

Tetsür trok aser tebur asem asü, ta Interior Minister Gerhard Karner-i ashi. Iba lendong agütsür mapang tatsüka tsüngta prangbong bena aliba arishi küm 21 tain tebur ka school bathroom nung pa sasa pa takum agi, ta police ajanga ashi.

Iba lendong nung yiruba nisung 28 mozüki nung temang anepalua liasü ta ashir.

Iba lendong agütsüasang ya Austria nunger aser taoba mapang Dreierschützengasse nung zünga liasü saka graduate mesütet, ta Karner-i Brehostibar nikongdang osangbener senden ka nung ashi.

Iba nisungba ya taoba mapang police temi memeteti liasü, ta ashi.

Tang tashinung osang ngutetba agi, iba lendong agütsüba nung amshiba prangbong ana ya sorkar ozüing nung aliba ama pa meyong aser firearms licence-a ka liasü, ta police-i ashi.

Austria nung anogo asem mang ayimtsü sangdongogo aser asürtem nem akhum agüja Bodhbarnep 10:00 ako nung

linük tesem ajunga nung minute ka süngjema alitsü.

Austria indang APA news agency ajanga ashiba agi, iba lendong nung asürtem rongnung nisung tenet kaketshir lir.

School telung nung prangbong ola angashiba sülen operation ka anepdang 10:00 ako nung tenzü, ta police temi ashir.

Amakba aser hostage situation ketdangsüba specialist Cobra tactical unit ka school ki yagi yoka liasü.

Ketdangsür temi kaketshir aser tesayur ajak iba school ki nungi anizük aser police temia tangbo yangji lendong mali ta ashir.



Los Angeles downtown nung Federal Building ka jakdang nokdaka aliba California National Guard anasa longkak aiter kati El Salvador indang wako ayiploksüba noksa nung angur. Hombarnü US Tir Donald Trump-i National Guards tali 2,000 yoktsü totuyuba agütsü aser Pete Hegseth lenisüba kübok Defense Department-ia sorkar meyong ki o jen aser nisung kumzüka ayutsü asoshi active-duty Marines 700 shi yoktsü mulungogo.

Italian citizenship referendum nung tamakok alu

Rome, Aami/June 10 (Agencies): Senso akumba ozüing ajemtsü aser mapa inyaker temeden ulushitsü asoshi Italy nung referendum ka agiba 'invalid' ta sangdongogo.

Deobarnep nungi Hombar nikongdang tashi agiba poll nungya Italy nunger vote agütsütsü temsüa alir tajemba agia shilem 50-i vote agütsüba ajanga dang telemtetba agitetsü liasü, saka voters shilem 30 shi ang arua shilem agia liasü.

Ballot nungya onük balala awajema tasüngdangba pongu liasü, kong nisung ka senso akumtsü asoshi Italy nung küm ter alitsü ozüing yanglua aliba küm pongu ajemtsüba densema liasü.

Iba referendum ya nüburtemi animesor tenzü, aser civil society telok aser trade union temia yaria Yes vote atema nübuyima liasü.

Sicily aser Calabria amala region tem nungbo vote agütsür ya shilem 22 tashi liasü, anungji iba osang ya parnok asoshi tejashitsü osang ka lir.

Shilem 50 ajungtsü ya teti tasak liasü, kechiaser hard-right Ato Kilonser Giorgia Meloni-i aniba sorkar iba referendum senzüka yutsü mesüra nüburtem dang vote magütsütsü ajungshia liasü.

Taoba hopta Meloni-i iba vote magütsütsü ta sangdong aser Italy indang citizenship law tang aliba ya kanga junger ta shia liasü. Lai Honibarnü Rome nung polling station ka semdang,

saka vote magütsü.

Ajisüaka activists temi citizenship atema apply asütsü küm ter atatsü ya langrara ta ashi aser küm pongu ajemtsüba ajanga Italy ya kidanger European linüktem den kasa akumtsü ta ashir.

Polls tembanger mapang tatsüka tsüngta Meloni indang Brothers of Italy (FdI) party ajanga Instagram nung opposition lenir indang noksa lemsatep aser tsünglanglen "Nai makok!" ta zülua liasü.

"Iba referendum indang nükjidong chichiba ya Meloni sorkar laodaktsütsüba liasü. Ajisüaka tatem nung Italy nungeri nenok laodaktsü," ta post nung ashi.

Opposition Democratic Party (DP) nungi Pina Picierno-i iba referendum tamakok ya paidoktettsüba liasü ta ashi aser shilem 50 metongtetba ya Giorgia Meloni asoshi sempet tulu lir, ta ashi.

Italy nung referendum ka alitsü asoshi meyongnem million tesadang ka nüngdaker. Saka tangbo iba dang timba kumdaktsütsü akhanger.

"Asenoki bendang lima nung aliba Italy nunger vote agütsüdaktsütsü asoshi ballots million aika yokba nung sen jenti indok, aser item ajakji amajok kumogo," ta foreign minister Antonio Tajani-i Hombarnü ashi.

World War II zülen Italy nung referendums 78 agiba nungi tesadang ka shi nung vote peria ngua liasü.

Israeli navy-i Houthi-i azüoka aliba Hudaydah yimti amak

Tel Aviv, Aami/June 10 (Agencies): Israeli navy rongtemi Yemen nung Houthi teloki azüoker aliba Hudaydah yimti maka liasü.

Israeli military-i ashiba agi, parnoki iba yimti amakba ya Houthi teloki missile amshia Israel kübok tesem balala amakba atema telangzüba agütsüba, aser military inyakyim balala atema rongnendak amshiba anendaktsütsü nükjidong nung iba tzüküm nung aliba yimti maka liasü.

Iba lendong nung nisung asüba osangbo kecha mali.

Social media nung lemsatepba noksatem ajanga rongnendak nungi mokozü adokba sayuogo aser Houthi meyong al-Masirah TV-i iba tesem anaben amakba osang agütsüogo.

Gaza nung Palestine nungertem pusema Houthi teloki Israel dak missile khalokja arudar. Brehostibarnü Houthi puri yokba missile ka Jerusalem kolak nung khadang aser taoba ita missile ka agi Israel indang airport tongtiba kongshia liasü.

Hudaydah yimti ya teti ama tayimtsü agi masü saka navy rongtemi makogo. Navy-i iba yimti ya Mongolbar anepdang

maka liasü.

Israel Defense Forces (IDF)-i Hudaydah port nung alirtem aser Houthi teloki züoka aliba Ras Isa aser Salif port nung alirtem danga pei aliba tesem azüngtettsütsü tekümdangtsü metetdaksür liasü.

"Kiralongrar Houthi telok yagi parnoki kiralongraba inyakyim atema rongnendak amshiba ajanga onoki osang tejangja ka magütsü tashi port nung alirtem dang nenok kümzüka alitsü atema item tesemtem nungi atsüngintsü mepeshir," ta IDF Arabic otongdar Avichay Adraee-i X nung zülutsü.

Houthis indang media office deputy tekolakba Nasruddin Amer-i X ajanga, iba rongnendak amakba ajanga par telok inyaksangshi dak kecha balaka mekongshi.

"Iba ajanga ozü nüburtem dak kecha mekongshir, shirnoki Gaza pusema hoptashia yimtung nung longkak aitdar," ta pai zülutsü.

Hudaydah port ya Yemen nung million aika atema chiyongtsü aser tanga humanitarian teyari bener aitba tesem tongtiba lir, koba Israel-i aiben maka arudar.

4 Nations Tournament atema Indian junior team sangdongogo



Aami/June 10, 2025 (Agencies): Taruba Four Nations Tournament atema Hockey India-i Mongolbarnü India junior tebur team sangdongogo. Iba asayamung ya Berlin, Germany nung June 21 nungi 25 tashi asayatsü.

Iba asayamung nung India, Spain, Australia, aser hosts Germany asayatsü.

Asayamung nung team ajak single round-robin format nung ajak den khen khen asayatsü. Iba sülen temaba jenjang nung tembangba team ana final-i aitsü aser tasembuba o pezübuba nung tembangba team classification match ka asayatsü.

Tongtibannga iba asayamung ya India nung asayartem asoshi FIH Junior Men's Hockey World Cup 2025 asoshi renemshiba asayamung ka asütsü, koba kidang Chennai aser Madurai nung November 28 nungi December 10 tashi asayatsü.

India team ya forward Araijeet Singh Hundal lenisüba

nung asayatsü aser Defender Amir Ali Vice-Captain asütsü.

Team nung goal keeper ji Bikramjit Singh aser Vivek Lakra na asütsü aser defence nung Amir Ali, Talem Priyobarta, Shardanand Tiwari, Sunil P B, Anmol Ekka, Rohit, Ravneet Singh, aser Sukhvinder nung densema lir.

Midfield nung Ankit Pal, Manmeet Singh, Rosan Kujur, Rohit Kullu, Thockchom Kingson Singh, Thounaojam Ingalemba Luwang, Adrohit Ekka, aser Jeetpal nung asayatsü aser forward nung Gurjot Singh, Sourabh Anand Kushwaha, Dilraj Singh, Arshdeep Singh, captain Araijeet Singh Hundal, aser Ajeet Yadav nung densema lir.

Adarsh G (goalkeeper), Prasant Barla (defender), Chandan Yadav (midfielder), aser Mohd. Konain Dad (forward) nung standby player ama shimogo.

Asayamung indang jembiba mapang Indian junior men's

team coach PR Sreejesh-i, "4 Nations Tournament ya taküm küm tatemlen asayatsü aliba FIH Junior World Cup atema renemshiba nung tongtibanng shilem ka lir. Iba ajanga onok nem temaba jenjang nung asayaba international team tem den asayatsü maongka agütsütsü, koba lanur asayartem terenlok atema kanga tongtibanng lir," ta ashi.

Squad:

Goalkeepers: Bikramjit Singh, Vivek Lakra.

Defenders: Amir Ali (Vice-Captain), Talem Priyobarta, Shardanand Tiwari, Sunil P B, Anmol Ekka, Rohit, Ravneet Singh, Sukhvinder.

Midfielders: Ankit Pal, Manmeet Singh, Rosan Kujur, Rohit Kullu, Thockchom Kingson Singh, Thounaojam Ingalemba Luwang, Adrohit Ekka, Jeetpal.

Forwards: Araijeet Singh Hundal (Captain), Gurjot Singh, Sourabh Anand Kushwaha, Dilraj Singh, Arshdeep Singh, Ajeet Yadav.

Nicholas Pooran international asaya nungi anisüngzüker



Aami/June 10, 2025 (Agencies): Nicholas Pooran arishi küm 29buba nung international cricket asaya nungi anisüngzüker. Pooran ya alima nung T20 batter tem rongnung tajungtiba ka lir.

Trinidad nungi asayar ya West Indies tenüng nungi 167 ben asayaogo, saka tang iba telemtetba agiba ajanga pa franchise league tem nung rangloker asayatsü atema maongka agütsütsü.

Indian Premier League (IPL) nung Lucknow Super Giants nungi asayaba sülen anisüngzüksü atema pai tang West Indies team England den T20 asayamung ka asaya aliba nung shilem magitsü telemtetba

agia liasü.

Pa taküm lemluwa Major League Cricket (MLC) nunga asayatsü atema tenangzüktepba yanglur lir.

Cricket West Indies-i, "onoki pa takok asoshi tetushi agütsür aser pai tesem balala nung fan tem jangrademdakja asayaba atema pelaba lemsater

"Pa tarutsü takok nung aotsü imlaja atar," ta kasa sangdong ajanga metetdaksü.

Franchise league nung asayatsü atema international cricket asaya nungi anenba asayartem rongnung Pooran ya mezüng masü, saka pa arishi küm tain masü aser pa profile tajung asüba ajanga kanga shisanger. South Africa nung

asayar Heinrich Klaasen-ia taoba hopta international asaya nung ojang dang asayatsü telemtetba agiba sangdongogo.

West Indies captain Shai Hope dang Pooran-i England den asayamung nung shilem magitsü atema telemtetba agiba indang asüngdangba mapang, pai iba telemtetba agiba ajanga pa tarutsü nung team nung shimtsü asoshi kecha tetsükdaksü madoktsü, ta ashi.

Osang ajanga ashiba agi, Pooran-i pa asaya nungi anentsü atema telemtetba agiba ya Hombarnü West Indies cricket nem metetdakja liasü.

Pa tatemsa West Indies tenüng nungi 2024 küm December ita Bangladesh den T20 asayamung ka nung asaya, saka pa ODI nungbo 2023 küm July ita nungi tang tashi khen danga asaya mali aser Test-a ka danga masaya.

T20 internationals nung Pooran ya West Indian nung rongnungi asaya (106) timba nung asayaba asayar lir aser run-a pai timba yanglur lir. Pai tang tashi nung run 2,275 yanglur lir.

WTC Final atema South Africa team sangdongogo

Aami/June 10, 2025 (Agencies): Australia den World Test Championship Final asayatsü atema South Africa-i team tashi tait ka sangdongogo. Iba asaya ya Bodhbarnü tenzüksü.

Captain Temba Bavuma-i team sangdongogo, koba batting aser bowling naprongla nung kanga liromedema aliba team ka lir. South Africa team tang mezüngbuba WTC Final nung asayatsü lir.

Batting order tekolaklen Ryan Rickelton lir, shiba WTC 2023-25 cycle nung South Africa nung rongnungi run timtiba yangluba asayar lir. Pa den Bavuma Aiden Markram aser Tristan Stubbs nung lir.

Asayartem rongnung No. 3 nung asayatsü atema Wiaan Mulder shimba ya ajaki reprangtetogo. Pai Sri Lanka aser Pakistan na den Test asayaba mapang kanga junga asayaogo.

"Mulder iba position nung asayatsü kanga tanur lir. Ajiüsüa Mulder den asaya-a pai asayaba anguba sülen küm ana tsüngda pa red-ball format nung kanga renlokogo," ta Bavuma-i ashi.

Team nung Keshav Maharaj

kija specialist spinner lir aser Proteas pace attack nung Kagiso Rabada, Marco Jansen, aser Lungi Ngidi nung densema lir.

Dane Paterson, shibai Pakistan den asayaba mapang kanga junga asayaogo, pa iba asaya atema meshim. Pa meleni Ngidi shimba indang Bavuma-i rasa shiogo.

"Iba telemtetba agitsü ya ajak dang tasakba asü südi. Taoba season tatemlen Dane Paterson-i onok atema kechi inyaksüogo aji nguogo," ta Bavuma-i ashi.

"Ajiüsüa iba ya tactical point of view nungi liasü. Lungi-i tera takaraba onteter aser tar-a pa tera agi talangba lir.

"Ngid taoba mapang iba tesem nung asayaba tajangshiba bena lir aser pa record tera tajungba lir.

"Iba telemtetba agitsü ya onok asoshi temela masü asü," ta paisa shisem.

South Africa Playing XI: Aiden Markram, Ryan Rickelton, Wiaan Mulder, Temba Bavuma (c), Tristan Stubbs, David Bedingham, Kyle Verreynne (wk), Marco Jansen, Keshav Maharaj, Kagiso Rabada, Lungi Ngidi.

Man City-i Wolves defender Ait-Nouri alizükogo

Aami/June 10, 2025 (Agencies): Manchester City-i Wolves left-back Rayan Ait-Nouri pound million 31 agi alizükogo.

Arishi küm 24 tain Algeria nung defender yagi club nungi 2030 tashi asayatsü atema tenangzüktepba ka yangluogo aser pa Club World Cup group stage nung asayatetsü.

Iba asayamung nung City pur mezüngbuba asaya Morocco club Wydad AC den June 18 nü asayatsü.

Algeria nung international asayar Ait-Nouri ya 2021 küm Angers nungi pound million 14.9 agi Wolves nung aden. Iba masüdag pa Molineux nung loan nung oa asaya liasü. Pa taoba season Wolves nungi 41 ben asayaogo aser iba mapang pai goal pongu idaktsü aser assist tenet süja liasü.

Pa ya taküm lemluwa Wolves nungi nungutu asayartem tanga club-i aoba tanabuba asayar kümogo. Manchester United-ia Brazil nung striker Matheus Cunha pound million 62.5 agi alizüktsü mulunga agizükogo.

City-i AC Milan aser

Netherlands midfielder Tijjani Reijnders pound million 46.3 agi alizüktsü mulunga agizükogo, koba January transfer window nung parnoki pound million 200 intokba den bendenloksemtsü.

Ait-Nouri-i ashiba agi, "City ya alima nung club tulutiba rongnung ka lir aser iba club nungi asayatsü maongka anguba ya nükjidong atalokba ka lir."

"Ni Pep Guardiola aser pa indang coaching team den inyaka angazüktsü aser alima nung asayar tajungtibatem den training agia asayatsü yongyaseta atar," ta paisa ashi.

Kasa mapang nung City puri ano Chelsea nungi English goalkeeper Marcus Bettinelli alizüktsü jembishinüdar.

Arishi küm 33 tain goal keeper ya Stamford Bridge nung taoba season pezü third choice keeper liasü aser City-i Mongolbarnü transfer windor meshibang tsüngda pa alizüktsü nükjidong lir.

Taoba mapang City-i, parnok goal keeper Scott Carson-i pa indang contract tembangba sülen club toktsütsü ta shir liasü.

BILEMDANGANG

"Tangar sempet nükshia kazüdag nü sempet tesamadaktsü."